

Na osnovu čl. 4.2, 4.7. i 7.5. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. Pravilnika o licencama – Prečišćeni tekst ("Službeni glasnik BiH", broj 63/16), Državna regulatorna komisija za električnu energiju, na sjednici održanoj 8. decembra 2021. godine, donijela je

## **ODLUKU**

### **O UKIDANJU LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM**

- (1) Ukida se licenca za obavljanje djelatnosti međunarodne trgovine električnom energijom izdata pravnom licu "LE Trading BH" d.o.o. Banja Luka Odlukom Državne regulatorne komisije za električnu energiju broj 05-28-12-192-22/20 od 28. jula 2020. godine, na zahtjev vlasnika licence.
- (2) Ova Odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

### ***Obrazloženje***

Pravno lice "LE Trading BH" d.o.o. Banja Luka (u daljnjem tekstu: podnosilac zahtjeva) podnijelo je Državnoj regulatornoj komisiji za električnu energiju (u daljnjem tekstu: DERK) zahtjev, zaveden pod brojem 05-28-12-297-1/21 od 28. oktobra 2021. godine, za ukidanje posjedujuće licence s obzirom na poslovnu odluku upravljačkih struktura ovog pravnog lica o prestanku daljnjeg obavljanja djelatnosti međunarodne trgovine električnom energijom.

Naime, podnosiocu zahtjeva je Odlukom DERK-a od 28. jula 2020. godine pod brojem 05-28-12-192-22/20, izdata licenca za obavljanje djelatnosti međunarodne trgovine električnom energijom na period od 1. septembra 2020. godine do 31. augusta 2025. godine.

Uz zahtjev za ukidanje licence nije podnijet dokaz o prethodno uplaćenju naknadi za njegovu obradu, propisanu Odlukom o visini jednokratne naknade za provođenje postupka u skladu sa Pravilnikom o licencama ("Službeni glasnik BiH", br. 41/13 i 17/16), o čemu je upoznat podnosilac zahtjeva.

Budući da uplata naknade nije izvršena, a imajući u vidu da je DERK konstatirao ozbiljna kršenja Standardnih uvjeta za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16), Odlukom DERK-a broj 05-14-2-165-11/21 od 9. novembra 2021. godine, podnosiocu zahtjeva suspendirana je ranije izdata licenca. Istodobno, Zaključkom broj 05-28-12-306-1/21 pokrenut je postupak njenog ukidanja na inicijativu DERK-a. Razlozi za ovakvo postupanje nalazili su se u činjenici da je Operator za obnovljive izvore i efikasnu kogeneraciju dopisom broj 02-1-2020-1/21 od 27. oktobra 2021. obavijestio podnosioca zahtjeva, DERK i Regulatornu komisiju za energetiku Republike Srpske o blokadi računa zbog neizvršenja plaćanja preuzetih obaveza prema Ugovoru o uređenju međusobnih odnosa. Pored navedenog, Nezavisni operator sistema u Bosni i Hercegovini (NOS BiH) je dopisom broj 1217-1/21 od 28. oktobra 2021. godine obavijestio DERK da je istog dana vlasnik licence na određeno vrijeme isključen sa tržišta električne energije u Bosni i Hercegovini, zbog neispunjavanja finansijskih obaveza prema NOS-u BiH, a koje su definirane Tržišnim pravilima, Ugovorom o balansnoj odgovornosti i relevantnim odlukama DERK-a. Zaključku da izostaje finansijska stabilnost reguliranog subjekta i odlukama DERK-a o suspenziji licence i pokretanju postupka njenog ukidanja, doprinijela je i činjenica da podnosilac zahtjeva nije izmirio obaveze ni prema DERK-u po osnovu regulatorne naknade za IV kvartal 2021. godine. O poduzetim radnjama i donesenim

aktima DERK-a upoznat je podnosilac zahtjeva, a u dnevnim novinama i na zvaničnoj internet prezentaciji DERK-a objavljena je i obavijest za javnost u postupku ukidanja licence, kojom su sva zainteresirana lica pozvana da do 26. novembra 2021. godine podnesu svoje komentare u vezi sa predmetom postupka ili zahtjev za sticanje statusa umješača u pokrenutom postupku ukidanja licence. U ostavljenom roku, DERK-u nisu dostavljeni komentari, niti je bilo podnesenih zahtjeva za sticanje statusa umješača.

U međuvremenu, podnosilac zahtjeva je u periodu od 22. do 26. novembra 2021. godine kompletirao potrebne uplate na ime naknade za obradu ranije podnesenog zahtjeva za ukidanje licence, kao i izmirenja dugovanja prema DERK-u po osnovu regulatorne naknade za IV kvartal 2021. godine. Polazeći od toga da provođenje postupka ukidanja licence na inicijativu DERK-a, na način propisan Pravilnikom o licencama – Prečišćeni tekst, iziskuje održavanje javne rasprave, uz prethodno objavljivanje odgovarajuće obavijesti u dnevnim novinama koje se distribuiraju na teritoriji cijele Bosne i Hercegovine, značajno je dugotrajniji u odnosu na postupak koji se vodi na zahtjev vlasnika licence. Imajući to u vidu, kao i interes podnosioca zahtjeva da prestane obavljati djelatnost međunarodne trgovine električnom energijom, to je na osnovu člana 51. stav 1. tačka a) Pravilnika o licencama – Prečišćeni tekst, odlučeno kao u dispozitivu ove Odluke.

U skladu sa članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine, podnošenjem tužbe u roku od 60 dana od dana prijema.

Broj: 05-28-12-297-3/21

8. decembar 2021. godine

Tuzla

Predsjedavajuća Komisije

Branislava Milekić